

NÉHÉMIE

1 Mejô me Néhémie mone Hacilia. A nga bo na, ngone Kisleu, mbu mewôm mebaa, éyoñ me nga to Suse nda njô bôt, 2 ane Hanani, môte wua ya bobejañe bam, a nga zu, ba be bôte bevo'o be so'o Juda ; ane me nga sili be ajô Bejuif be nga nyiñ, ba be nga li'i te ke minkôm, a mam m'abobane Jérusalem. 3 Ane be nga jô me na, , Ba be nga buk te ke minkôm, be ne si éte b'adañe yen abé a wô' ôson : nalé fe meka'a meko'o ya Jérusalem ma maneya tyamban, a mimbé ya été ya été mi maneya di' a nduan.

4 A nga bo na, éyoñ me nga wô'ô mejô mete, ane me nga tabe si a yi, a wô' ôlun abe melu ; ane me nga tysi bidi a ye'elane asu Zambe ya yôp, 5 a jô na, M'aye'elane wo, A Jehova, Zambe ya yôp, Zambe a ne anen a angôndô, nyô a wô'ô ba'ale élate já a mvamane ba b'anye'e nye a ba'ale metiñé mé, na : 6 alo dôé e baba'an, a mise môé ma kuiba'an, nde te w'aye vô'ôlômeye'elane me mbo ésaé wôé, mme m'aye'elane wo éyoñe ji môse ba alu , ajô bone be Israël bebo bisaé bôé, me meme fe mam abé ya bone be Israël, mme mete bi boyo wo. Ya, ma a nda bôt ésa wom bi maneya bo abé : 7 bi nga dañe bo wo abé, a bo te ba'ale metiñ, nge memvinda, nge minjôan, mbie ô nga tiñeti Moïse mbo ésaé wôé. 8 M'aye'elane wo na, tame siumesane ajô ô nga tiñeti Moïse mbo ésaé wôé, a j^po na, Nge mi aye kop, m'aye miase mia meyoñ étê : 9 ve nge mi aye bulan be ma, a ba'ale metiñé mam a bo me, ja'ane bôte bena be nga wuabane fé be to susu'a ya yôp étê, ve m'aye koane be vôme ate, a zu be vôm me nga top, jôé dam e tabe'e vôm ate. 10 Bana be ne bebo bisaé bôé a bôte bôé, mbe ô nga kôté a beta ngule wôé, a wo wôé ô ne éwôlô. 11 A Tat, m'aye'elane wo na, , alo dôé e baba'an mfa'a meye'lane me mbo ésaé wôé, a meye'elane bebo bisaé bôé, b'anye'e be ko jôé dôé woñ ; m'aye'elane fe wo ô yebe na, mame ya mbo ésaé wôé me ke ôsu môse wu, a ve nye mvam mise mé môte nyô.

2 Me nga to mbi élaé be njô bôt. 1 A nga bo na, ngone Nisan, mbu mewôm mebaa Artaxerxès njô bôt a nga jôô, éyoñ a nga nyu vin, ane me nga to'é vin, a kee nje njô bôt. Ve me nji tame bo éyôé vôm a nga to. 2 Ane njô bôt a nga jô me na, Asu dôé d'ayôan amu já, te ke na w'akon ? jam ete e nji bo jam afe ve ôlune ya nlem. Eyoñ éte me nga dañe ko woñ abui. 3 Ane me nga jô njô bôte na, Njô bôt a tabe'e nnôm éto : asu dam d'abene yôan a já, éyoñ éte nlam, vôm mesoñe betate me né, ô jô'ô bilik, a mimbé meka'a ya été mi nti ndi'an a nduan ? 4 eyoñ éte njô bôt a nga jô me na, , za jame w'aja'é ? Nalé me nga ye'elane Zambe ya yôp. 5 Ane me nga jô njô bôte na, Nge njô bôt a nye'e, a nga mbo ésaé wôé a yeneya mvam mise môé, m'ayi na, ô lôme me Juda, nlam mesoñe betate, me lôñe wô. 6 Ane njô bôt a nga kobô ma(nga njô bôt a to nye fefe) na, Dulu dôé d'aye bo ntaa vé ? Nalé ate njô bôt a nga yen mvaé ya lôme ma ; ane me nga tiñeti nye melu. 7 Me nga jô fe njô bôte na, Nge njô bôt a kañese, be ve me bekalate ya ve bejôô be ne Osôé yat, ajô te b'aye lôte ma me kui Juda. 8 nalé fe kalate ya ve Asaph mba'ale afan njô bôt, a ve me bilé ya bo mimbôñ mfa'a mimbé ya nda ôlem é to jôm ya nya ndaa, a mfa'a aka'a ya nlam, a mfa'a ya nda m'aye nyin. Ane njô bôt a nga ve ma, aval ane mbamba wo ya Zambe wom a nga to be ma.

9 eyoñ éte me nga kui be bejôô ya Osôé yat, a ve be bekalate be njô bôt. Eyoñ éte fe njô bôt a maneya lôm bivet ya nsamba mewosan a bôt b'awulu bukabela yôp nsamba wom. 10 Eyoñ Sanballat mone Horonite, a Tobija mbo ésaé, mon Ammonite, be nga wô'ô jam étê , be nga dañe wô' ôlun, amu môt a soya jeñ mvaé ya bone be Israël. 11 Nalé me nga suane Jérusalem, a tabe wôé melu mela. 12 Ane me nga kôlô si alu se, bia be bôte bevak ; nalé fe me nji kate môt jam Zambe wom a nga futi me nleme na, me bo Jérusalem ; nalé fe tite fe é nji bo nsamba wom, ve tit me nga wulu je

yôp. 13 Ane me nga ke alu se zene ya mbé ya mbi'ili, mfa'a ya anjeñ akamayañ, é mbe mebi, a fombô meka'a meko'o ya Jérusalem, me nga to mintyaman, a mimbé ya étê mi to ndi'an a nduan. 14 Eyoñ éte me nga nemban akui mbé anjeñ akui fe ébata njô bôt : ve tit é nga to me si é nji yene vôme ya lôt. 15 Eyoñ éte me nga ke fe alu se zenen ya ôtoñ, a fombô akak ; ane me nga kôñelan, a nyin mfa'a mbé ya mbi'ili, nalé me nga bulan. 16 Bejôô be nji yem mfaa me nga ke, nge jam me nga ke bo ; nalé fe me nji ke tame kate de Bejuif, nge beprêtre, nge benya bôtô, nge bejôô, nge ba bevo'o be nga bo ésaé.

17 Eyoñ éte me nga jô be na, Mi lô mbia éto bi to, aval ane Jérusalem a nto ndaman, a mimbé meka'a ya étê mi to ndi'an a nduan : za'an bi tame lôñ aka'a ya Jérusalem, bi bo te fe beta bo jôme ya ôson. 18 Ane me nga kate be aval ane wo Zambe wom ô mbe mvaé mfa'a wom, nalé fe mejô me njô bôt, mme a nga kobô ma. Ane be nga jô n, Ntama kôlane si a lôñ. Nalé be nga ve mo map ngu mfa'a ya bo mbamba ésaé ate. 19 Ve éyoñ Sanballat mone Horonite, a Tobija mbo ésaé, mon Ammonite, a Guéschem mon Arabe, be nga wô'ô jam ete, be nga dañe woé bia, a biasé bia, a jô na, Za jame mi abo di ? ye mi aye ben njôan njô bôt ? 20 Eyoñ éte me nga yalane be, a jô be na, Zambe ya yôp, nnye a ye tindi mam mangan ôsu ; ajô te bia bebo bisaé bé bi aye kôlô si a lôñ : ve mi nji bo ngap, nge ngu, nge jôme ya simesan, Jérusalem étê.

3 Eyoñ éte élisabeth njô beprêtre a nga kôlô si ba be bobenyañe bé beprêtre, ane be nga lôñ mbé mintômba ; be nga telé wô étyi be Zambe, a telé fe biyombé ya étê ; be nga telé wô étyi akekui nda ya be Méa b'amombô aka'a yôp, akui fe nda ya be Hananeel b'amombô aka'a yôp. 2 ane be nga toé nye valé, a lôñ akak, be mbe bôte ya Jéricho. Ane môt a nga toé be valé, a lôñ akak, a mbe Zaccur mon Imri.

3 Ae bone be Senaa be nga lôñ mbé kos ; be nga bôé mimbôñe ya étê, a telé fe biyombé ya étê, akope ya étê, a mimfeta'a ya étê. 4 Ane môt a nga toé be valé, a kôm akak, a mbe Merémoth mon Urié, mona Hakkots. Ane môt a nga toé fe be valé, a kôm akak, a mbe Meschullam mone Bérékia, mone Meschézabeel. Ane môt a nga beta toé be valé, a kôm akak, a mbe Tsadok mone Baana. 5 Ane bôt be nga tôé fe valé, a kôm akak, be mbe Betekoïte ; ve benya bôtô bapbe nji ke metyiñ ésaé ya ésa wop étê.

6 Ane Jojada mone Paséach ba Meschullam mone Besodia be nga kôm nnôm mbé akak ; be nga bôé mibôñe ya étê, a telé biyombé ya étê, a akope ya étê, a mimfeta'a ya étê. 7 Ane bôt be nga tôé be valé, a kôm akak, be mbe Melacia mone Gabaonite, a Jadon mone Mérionothite, bôte ya Gabaon a Mitspa, be mbe bôte ya éto njô a nga to Osôé yat. 8 Ane môt a nga tôé nye valé, a kôm akak, a mbe Uzziel mone Harhaja môte ya belui or. Ane môt a nga tôé nye valé, a kôm akak, a mbe Hanania, môte wua ya bekôme biôme ya mbamba menyum, mbe be nga lôñe Jérusalem ôlem akekui aka'a é ne ndam. 9 Ane môt a nga tôé be valé, a kôm akak, a mbe Rephaja mone Hur, évete ya étun afôla ya Jérusalem. 10 Ane môt a nga tôé be valé, a kôm akak, a mbe Jedaja mone Harumaph, nye a nga kôme zôsô a nda jé. Ane môt a nga tôé nye valé, a kôm akak, a mbe Hattusch mone Haschabnia. 11 Ane Malkija mone Harim, ba Haschub mone Pachath-Moab, be nga kôm étua aka' éfe, a kôme fe nda b'abombô akak'a yôp, nyô ya mimbe'e mi nduan. 12 Ane môt a na tôé nye valé, a kôm akak, a mbe Schallum mone Halloscheth, évete ya étun afôla ya Jérusalem, ba be bengone bé.

13 Ane Hanun, ba be bôt be nga to Zanoach, be nga kôme mbé ya mbi'ili ; be nga lôñe wô, a telé biyombé ya étê, akope ya étê, a mimfeta'a ya étê, a kôm akak nté meneyi'i me mo toyini wua akekui mbé mebi.

14 Ane Malkija mone Récab, évete ya afôla ya beth-Hakkérem, a nga kôm mbé mebi ; a nga lôñe wô, a telé biyombé ya étê, akope ya étê, a mimfeta'a ya étê.

15 Ane Schallum mone Col- Hozé, évete ya afôla ya Mitspa, a nga kôm mbé ya anjeñ : a nga lôñe wô, a dipe wô, a telé biyombé ya étê, akope ya étê, a mimfeta'a ya étê, a kôm aka' ébata ya Siloé fefel afup njô bôt, akekui ôbet vi asiliki ô so'o nlame David. 16 Ane Néhémie mone Azbuk, évet ya étun afôla ya Beyh-Tsur, a nga tôé nye valé, a kôm akak, akekui vôm a ne zôsô a mesoñe me David, a ke fe kui ébata é nga lôñeban, akui fe nda biwôlô bi bôt. 17 Ane Belévite, Rehum mone Bani, be nga tôé nye valé, a kôm a akak. Ane môt a nga tôé nye valé a mbe Haschabia, évete ya étun afôla ya Keïla ,mfa'a ya afôla si dé. 18 Ane bobenyañe bap, Bavvaï mone Hénadad, évete ya étune afôla y Keïla, be nga tôé nye valé, a kôm akak. 19 Ane môt a nga tôé nye valé, a kôm akak, a mbe ézer mone Josué, évete ya Mitspa, nnye a nga kôm étun éfe, zôsô a mbetan w'ake nda ya biôm mewosan vôm aka'a d'aviti. 20 Ane Baruc mone Zabbaï a nga tôé nye valé, a tu'a kôm étun aka' éfe, ataté vôm aka' é nga viti akekui mbé ya nda élisabeth njô beprêtre. 21 Ane Merémoth mon Urie mone Hakkots a nga tôé nye valé, a kôm étun aka' éfe, amane nda éliaschib. 22 Ane beprêtre, bôte ya Nje'ese, be nga tôé nye valé, a kôm akak. 23 Ane Benjamin ba Haschub be nga tôé be valé, a kôm aka'a zôsô a nda jap. Ane Azaria mone Maaséja mon Anania a nga tôé be valé a kôm akak fefe nda jé. 24 Ane Binnuï mone Hénadad a nga tôé nye valé, a kôm étun aka' éfe, ataté nda Azaria akekui nda aka' e nga viti, akekui abu' akak. 25 Ane Palal mon Uzaï a nga akak a vôm aka e nga viti, a kôme fe nda b'abômbô aka'a yôp é tele mfa'a ya nda njô bôté ne akôé nje é ne nseñ nsamba bezimbi w'aba'ale njô bôt. Ane Pedaja mona Pareosch a nga tôé nye valé, a kôm akak. 26 (Benéthinién be nga to Ophel, akekui vôm a ne zôsô a mbé mendim mfa'a jôp d'atô'ô, akui fe nda b'amombô aka'a yôp é tele valé.) 27 Ane Betekoïte be na tôé nye valé ; a kôm étun aka' éfe, zôsô a beta nda b'amombô aka'a yôp a tele valé, akekui fe aka'a ya Ophel.

28 Ane beprêtre be nga kôm aka mbé bikabela, akôé, môt ase zôsô a nda jé. 29 Ane Tsadok mon Immer a nga tôé be valé, a kôm akak zôsô a nda jé. Ane Schamaea mone Schecania, mba'ala mbé ya jôp

d'atôô, a nga tôé nye valé, a kôm akak. 30 Ane Hanania mone Schéléma, ba Hanun mona samane Tsalaph a nga biaé, be nga tôé nye valé, akôm étun aka' éfe. Ane Meschullam mone Bérékia a nga tôé nye valé, akôm akak zôsô a étun nda jé. 31 Ane Malkija, môte wua ya belui or, a nga tôé ne valé, a kôm akak akekui nda ya Benéthinién, a nda ya bekuan abom, zôsô a mbé ya Miphkad, a ke fe kui mbetane ya abu'akak. 32 Ane belui or ba be bkuan abom be nga kôm akak zañ mbetane ya abu' akak a mbé mintômba.

4 Ve a nga bo na, éyoñ Sanballat a nga wô'ô na, bi alôñ akak, a nga yaa, a dañe wô' abé, a kobô Bejuif ékpwe'ele. 2 An a nga kobô melo me bobenyañ bé a nsamba mewosane ya Samarie, a jô na, Mintete'e Bejuif mite mi abo jé ? ye b'aye lôñ bebijen ôlem ? ye b'aye tyi'i biôm ? ye b'aye mane môse wua ? ye b'aye wômôlô mekok me so'o mevise me mbuan, vôm me nga di'iban nduan ? 3 Eyoñ éte Tobija mon Ammonite a to nye fefe, ane a nga jô na, Ja'ane jôm b'alôñ, nge mvaj j'aye bet étê, j'aye bu' aka'a meko'o dap. 4 Vô'ôlô'ô, A Zambe wongan : amu b'abiasé bia : kôñela'an mbia nkobô wop minlô miape yôp, a suu be be bo jôm bôt b'aye sa si ya minkôm ; 5 te buti mbia be mam map, nalé fe te me'ete na, abé dap é tyamban asu dôé ; amu be maneya soñe wo ô yaa mise ba b'alôñ akak ; ane ngum aka' ôse ô nga mane lateban akui ézezañ nté ya yôp : amu bôt be nga to nleme ya bo ésaé.

7 Ve a nga bo na, éyoñ Sanballat, a Tobija, a Bearabe, be nga wô'ô na, esaé ya kôm meka'a ya Jérusalem é nga ke ôsu, a mvôm me nga to ndaman me nga taté diban, éyoñ éte be nga dañe yaa ; 8 ane besé be nga bôndé fe'e na, b'aye zu wosane Jérusalem, a zametane mam ya étê. 9 Ve bi nga ye'elane Zambe wongan, a telé ésobo'o ya mombô be môse ba alu, amu be. 10 Ane Juda a nga jô na, Ngule ya bebe'e mimbe'e é boy a tyôtyoé, a mbuan ô dañeya abui ; ajô te bi se ngul ya lôñ akak. 11 Minziziñe miangan mi nga jô fe na, B'aye bo te yem, nge yen, akekui bi kuiya be zañ, a wôé ba, a bu'u ésaé étê. 12 A nga bo na, éyoñ Bejuif be nga to be mefefe be nga zu, be nga jô bia biyoñ awôm be so'o vôm ase na, Mi ayiane bulane be bia. 13 Ajô te me nga telé bôt mefôla me nga dañ édok mfa'a mefôla me mbe

mvus akak, a mefôla me nga yoo, vôm ate me nga telé bôt aval ane menda me bôte map me né, be bili minkpwaté mekône miap, a mekoñ, a bilaé. 14 Ane me nga fombô, a kôlô si, a jô benya bôtô, a bejôô, abôte bevo'o na, Te koane be woñ : simesa'ane Tate, nyô a ne éwôlô a angôndô, a mi wosa'an ajô bobebnyoñ, a bo be fam benan, a binga benan, a bengone benan, abinga benan, a menda menan.

15 A nga bo na, eyoñ besiñe bangan be nga wô'ô na, bi yemeya jam ete, a yeme fe na, Zambe a maneya zamatane fe'e jap, ane bia bese bi nga bulan mfa'a ya akak, môt ase a kele'e ésaé jé. 16 A nga bo na, ataté éyoñ éte a ke ôsu, éfase jia ya bebo bisaé bam é nga bo ésaé, a éfas évo'o ya be be é nga bi mekôn, a bebien, a bilaé, a melô'ô bityé ; bejôô ke be tele nda bôte Juda ése mvus. 17 Ba benga lôñ akak aba be nga be'e mimbe'e be nga kô'ôlane bebiene mimbe'e ; môt ase a nga bo ésaé a wo wua ya mo mé, a bili fe jôm mewosan wo mbok ; 18 nalé fe be nga lôñ, môt asea nga bili nkawpté mekôn ntinetan angenteñ, nalé a nga lôñ. A nyô a nga bo a loñe' toñ a nga to me fefe. 19 Ane me nga jô benya bôtô, a bejôô, a bôte bevo'o na, Esaé é nto éwôlô a anen, a bi nto nkandan aka' akak, nyina a to nyô mbo' ôyap : 20 vôm ase mi aye wô'ô toñ é kobô'ô, mi sula'ane be bia valé ; Zambe wongan a ye wosan ajô dangan.

21 Nalé ate bi nga bo ésaé ; éfase bôte jia é bili mekoñ ataté melende me tyé akekui éyoñ ataté e nga té. 22 Nalé fe me nga jô bôt éyoñ éte fe na, Môt ase mba mbo ésaé wôé be bômbô'ô Jérusalem ét, ajô te b'aye bo bia beba'ale alu, a bo fe ésaé a mûs. 23 Nalé ate mamien, to bobejañ, to bebo bisaé bam, nge bôt ya nsamba bezimbi ô nga tôñe ma, te ke môte wua ya be bia a nga vaa mengômesan, ve môt ase a nga bo a kele' ôsôé, a bili jôm mewosane mo.

5 Eyoñ éte beta ñyôñ a nga bo, a so'o be bôt ba be binga bap, be kobô'ô bobenzañe bap Bejuif abé. 2 Amu bevo'o be na to be nga jô na, Bia, a bo be fam bangan a bengone bangan, bi ne abui : bi tame nyoñe fôn, bi di a nyiñ. 3 Bevo'o fe be nga to be nga jô na, Bi ave mefup bidi mangan, a mefupe mindik, a menda, bi bo biban, : bi tame nyoñe fôn, amu zaé. 4 Bevo'o be nga to be nga jô na, Bi maneya kôlé moné ya ya'ane taxe njô bôt, a señe mefup bidi mangan a mefup mindi'i mangan. 5 Ve éyoñe ji minsône miangan mi ne avale ane minsône mi bobejañe bangan, a bone bangan avale bone bap : tame yen, bi ake bo be fam bangan a bengone bangan éto belo, be bo bebo bisaé, a bengone bangane bevo'o be nto belo éyoñe ji : bi te ngule ya sa'ale ajô di ; amu bôte befe be bili mefup bidi mangan amefupe mindi'i mangan.

6 Ane me nga dañe yaa éyoñ me nga wô'ô miñyône miap, a wô'ô fe mejô mete. 7 Eyoñ éte me nga bôndé fe'e nlem, a sôane benya bôtô a bejôô, a jô be na, Mia môt ase mi amiate miyoñ nsenge. Ane me nga bo beta ésulan ya sôane be. 8 Ane me nga jô be na, Bi maneya ve abime ngule dangan a kôté bobejañe bangan Bejuif, be be mbe nkuane meyoñ été ; ye mi ne fe kuane bobenoñe benan, nalé fe ya b'ayiane kuane be be bia ? Eyoñ éte be nga tabe bivô, te ke kuli éfia. 9 Me nga jô fe na, Jam mi abo é nji bo mvaé :ke mi ayiane wulu woñe Zambe wongan été, amu ôsone ya meyoñ me ne besiñe bangan ? 10 Mamiene fe, a bobejañe bam a bebo bisaé bam, bi akôlé be moné a fôn. M'aye'elane mia, njôka'an ajô nsenge di. 11 M'aye'elane mia na, Bula'ane be, a mefup mindik, a mefup beolivier, a menda map, nalé fe mengap ntet, bula'ane be ngape jia ya moné, a fôn, a mfefé vin, a mbon, mbie mi wô'ô soñe be. 12 Eyoén éte be nga jô na, Bi aye bulane bie, te ke sili be jôm ; nalé bi aye bo, aval ane w'ajô. Eyoñ éte me nga loene beprêtre, a tiñeti be nya atiñi na, b'aye bo ane b'te tiñeti. 13 Me samese fe éwomane jam afôla ya mebé yôp, a jô na, Aval ete Zambe a samese'e môt ase mfa'a ya nda jé, amfa'a ya ésaé jé, nyô a bo te baale atiñe di ; aval ete fo'o a samese'e nye, akute nye si. Ane ngum ésulan ôse ô nga jô na, Amen, a kañe Jehova. Ane bôt be nga bo aval ane atiñ ete e nga to.

14 Nalé fe n ataté éyoñ me nga téléban njôô wop si ya Judée, ataté mbu mewôm mebaa Artaxerxèx njô bôt a nga jôô, e ne na, mimbu awôm a mibaé, bia be bobejañe bam bi ni di bidi bi njôô. 15 Ve bejôô be nga tate tebe me ôsu,

bôt mbe be nga ya'ane be biôm, a be nga bo be nyoñe' fembé a vin, a nyoñe fe besicle be argent mewôm menyin ; ya, ja'ane bebo bisaé bap be nga jôô bôt : ve me nji bo nalé, amu woñe ya Zambe. 16 Ya, me nga ke fe ôsu ésaé ya aka'a di, nalé fe bi nji ke kuse si : a beo bisaé bam bese be nga mane sulane vôm ate mfa'a ya ésaé. 17 Ajô afe, bôt be nga to tawôlô wom, mfa'a ya Bejuif a bejôô, bôt ntet a mewôm metan, te lañe ba be nga zu be bia be so'o meyoñ me mbe bia mbôma'ane. 18 Nkômane bidi be nga bo be kôme' môse wua ô mbe na, nnôm ényaka wua, a mintobane mintômba misaman ; be nga kôme fe bekup mfa'a wom, a éyoñe jia nté melu awôm be nga kôme fe mevale me vin mese : ve akôsa bo jame di ese, me nji sili bidi bi njôô, amu mbe'e ô mbe bôt bete adit. 19 A Zambe wom, ô simesa'ane ma mfa'a ya bo me mvaé, amu mam mese me boy a bôte ba.

6 A nga b na, éyoñ eb nga kate Sanballat ba Tojiba, a Gueshem mon Arabe, a be siñe bangan bevo'o te fe li'i e yoo étê (a kôsa bo akekyi éyoñ éte me ngenan te tame telé biyombé mimbé ya aka'a étê), 2 ane Sanballat ba Guéschem be nga lôme me tyiñe na, Za'a bi tôbane jal éziñ nje'esee ya Ono. Ve be nga ve'e fe'e na b'aye bo me jam. 3 Ane me nga lôme be bôt, a jô na, M'abo beta ésaé, ajô te me se ngule ya sis : amu jé ésaé j'ayiane tebe, nté m'ali'i je, a sisie be mia ? 4 be nga bañete me nalé biyoñe binyin ; me ve yalane be avale da. 5 Wôna, Sanballat a nga lôme me mbo ésaé wé aval ete éyoñe tane, a bili nkulane kalate mo mé, 6 a nto ntilan étê na, Foé j'ake j'amialane meyoñ étê, a Gaschum a jô na, mia be Bejuif mi ave'e fe'e ya ben njôan njô bôt ; éfia éte w'alôñe je akak : a wo ô ye'e bo njô bôt wop, aval ane mejô ma me né. 7 O maneya fe telé bekulu mejô be kate foé jôé Jérusalem, a jô na, Njô bôt a nto Juda : éyoñe ji b'aye kate njô bôte foé aval ane mejô ma me né. Ajô ta, za'a bia wo bi bôndé mefe'e zañe jangan. 8 Eyoñ étê me nga lôme nye tyiñe na, avale mam w'ajô le e ne momo, ve w'ave'e me befe'e be so'o nleme wôé womien. 9 Amu ba bese be nga kômbô ve bia wo woñe minlem, be jô'ô na, Mo map m'aye te'e mfa'a ya ésaé, é bo te boban. Ve éyoñe ji, A Zambe, va'a mo mam ngu.

7 Ane me nga ke nda Schemaeja mone Delaja mone Mehétabeel, a to ndiban étê ; ane a nga jô na, Bi tame ke tôbane nda Zambe, temple étê, a bi tame dipe mimbé ya temple : amu b'aye zu wôé wo. 11 Ane me nga jô na, , Ye môt aval ane ma, a ye nyiine temple étê na,a nyii émien. M'aye ke nyiin. 12 Ane me nga fas, , ayene na, Zambe a nji lôme nye ; vz a nga kulu mejô mete ajô dam, a tele me ngame yat : nde Tojiba ba Sanballat be nga mane kuse nye. 13 Amu éfia ji a nga kusebane na, me bo woñ, a bo aval ete, a bo abé, nde te b'aye bi éfia ya lôm mbia foé, a ve fe me ôsone nyô. 14 A Zambe wom, ô simesa'ane Tobija ba Sanballat, aval ane mimboane miap mite mi né, a simesane fe Noadia nkulu mejôa minga, a bekulu mejô bevok, be nga ve me woñ.

15 Nalé aka'a e ne man éyoñ ngon élul é nto melu mewôm mebaé a metan, tañe melu mewôm metan a mebaé. 16 A nga bo na, éyoñ besiñe bangan bese be nga wô'ôtane jam ete, meyoñe mese me nga to bia mbôma'ane me nga ko woñ, a silibane si mise map bebién ; amu be nga yene na, ésaé étê é nga boban a Zambe wongan. 17 Nalé fe melu mete benya bôtô ya Juda be nga lôme Tobija abui bekalate, a bekalate be Tojiba be nga zu fe be be. 18 Amu bôt abui be to Juda be mbe ntiñetane ngame jé, amu a mbe nnômengone Schecania mon Arach ; nalé fe mone wé Jochanan a nga lu'u ngone Meschullam mone Bérékia. 19 Be nga bo fe be kañete'e mbamba mimboane mié asu dam, a kate fe nye mejô mam. Ane Tobija a nga lôm bekalate a kômbô ve me woñ.

7 Nde a nga bo na, éyoñ aka' e nga mane lôñeban, a me mane ya telé biyombé mimbé, a baba'ale mimbé, a beyia bia, a Belévite be maneya fe teléban, 2 ane me nga ve Hanani mojañe wom, ba Hanania njôô ya nda ôlem, njôane ya Jérusalem ; amu a mbe mbamba môt, a ko Zambe woñ a dañe bôt abui. 3 ane me nga jô be na, Mimbé mi aka'a ya Jérusalem mi bo'o te di'iban ve éyoñ étê jôp e tôoya ngu ; nalé fe nté b'amombô, be dibe'e mimbé, a mi fete'e fe mie :

Rev. Matthias MEYE

Secrétaire Général 1961

mi telé'é' fe minsamba bisobo'o mfa'a bôt be to Jérusalem, môt ase nsamba wé, a môt ase a ya mombô zôsô a nda jé.

4 Nlam ô nga to ndam a anen ; ve bôt be to été tyôtyoé, a menda me nji lôñeban.

5 Ane Zambe wom a nga futi me éfia nleme na, , me sulane benya bôtô, a bejôô, a bôt, ane b'aye lañebane bindan. Me nga yene kalate bindane bi ba be nga taté so ôsu, ane me nga yen ntilan été na, 6 Bana be ne bone ya étune si, be nga so mfa'a ya minkôme ya ba be nga ke minkôm, mbe Nabucadnetsar njô bôte ya Babylone njô bôte a nga ke be minkôm, a be nga bulane Jérusalem a Juda, môt ase nlame wé ; 7 ba be nga so nsamba Zorobabel, Josué, Néhémie, Azaria, Raamia, Nachamani, Mardochée, Bilschan, Mispéreth, Bigvaï, Nehum, a Baana.

Tañe befam ya bôte ya Israël é mbe na : 8 Bone be Pareosch, betoyini bebaé ntete wua mewôme zañbwa a bebaé. 9 Bone be Schephatia, , mintete mila mewôme zañbwa a babaé. 10 Bone be Arach, mintete misaman mewôme metan a bebaé. 11 Bone be Pachath-Moab, mfa'a ya bone be Josué a Joab, betoyini, bebaé mintete mwom awôme da a mwom. 12 Bone be élam, toyini wua mintete mibaé mewôm metan a benyin. 13 Bone be Zatthu, mintete mwom mewôm menyin a betan. 14 Bone be Zaccaï, mintete zañbwa a mewôm mesaman. 15 Bone be Binnuï, mintete misaman mewôm menyin a mwom. 16 Bone be Rébaï, mintete misaman mewôm mebaé a mwom. 17 Bone be Azgad, betoyini bebaé mintete mila mewôm mebaé a bebaé. 18 Bone be Adonikam, mintete misaman mewôm mesaman a zañbwa. 19 Bone be Bigvaï, betoyini bebaé mewôm mesaman a zañbwa. 20 Bone be Adin, mintete misaman mewôm metan a betan. 21 Bone be Ather, ba ya ézéchias, mewôm ébu a mwom. 22 Bone be Haschum, mintete mila mewôm mebaé a mwom. 23 Bone be Betsaï, mintete mila mewôm mebaé a benyin. 24 Bone be Hariph, ntete wua awôme da a bebaé. Bone be Gabaon, mewôm ébu a betan. 26 Befame ya Bethléhem a Netopha, ntete wua mewôm mwom a mwom. 27 Befame ya Anathoth, ntete wua mewôm mebaé a mwom. 26 Befame ya Beth- Azmaveth, mewôm menyin a bebaé. 29 Befame ya Kirjath- Jearim, Kephira, a Béeroth, mintete zañbwa mewôm menyin a bela. 30 Befame ya Rama a Guébea, mintete misaman mewôm mebaé a jia. 31 Befame ya Micmas, ntete wua mewôm mebaé a bebaé. 32 Befame ya Béthel a Aï, ntet wua mewôm mebaé a bela. 33 Befame ya Nebo mbok, mewôm metan a bebaé. 34 Bone be élam mbok, toyini wua mintete mibaé mewôm metan a benyin. 35 Bone be Harim, mintete mila a mewôm mebaé. 36 Bone be Jéricho, mintete mila mewôm menyin a betan. 37 Bone be Lod, Hadid, a Ono, mintete zañbwa mewôm mebaé a wua. 38 Bone be Senaa, betoyini bela, mintet ébu a mewôm mela.

39 Brêtre : Bone be Jedaïa, mfa'a nda bôte Josué, mintet ébu mewôme zañbwa a bela. 40 Bone be Immer, tpyini wua mewôm metan a bebaé. 41 Bone be Paschhur, toyini wua mintete mibaé mewôm menyin a zañbwa. 42 Bone be Harim, toyini wua awôme da a zañbwa.

43 Belévite : bone be Josué, mfa'a ya Kadmiel, mfa'a ya bone be Hodva, mewôme zañbwa a benyin. 44 Beyia bia : bone be Asaph, ntet wua mewôm me nyin a mwom. 45 Beba'ale mimbé : bone be Schallum, bone be Ather, bone be Akkub, bone be Hathitha, a bone be Schobaï, ntete wua mewôm mela a mwom.

46 Benéthinen : bone be Tsicha, bone be Hasupha, bone be Thabbaoth, 47 bone be Kéros, bone be Sia, bone Padon, 48 bone be Lebana, bone be Hagaba, bone be Salmaï, 49 bone be Hanan, bone be Guiddel, bone be Gachar, 50 bone be Reaja, bone be Restin, bone be Nekoda, 51 bone be Gazzam, bone be Uzza, bone be Paséach, 52 bone be Bésaï, bone be Mehunim, bone be Nephischsim, 53 bone be Bakbuk, bone be Hakupha, bone be Harthur, 54 bone be Batslith, bone be Mehida, bone be Harscha, 55 bone be Barkos, bone be Sisera, bone be Thamach, 56 bone be Netsiach, a bone be Hathipha.

57 Bone ya bebo bisaé be Salomon : bone be Sothaï, bone be Sophéreth, bone be Perida, 58 bone be Jaala, bone be Darkon, bone be Guiddel, 59 bone be Schephatia, bone be Hatthil, bone be Pokéreth-Hatsebaïm, a bone ya be Amon. 60 Benéthinen bese, a bone ya bebo bisaé be Salomon, be mbe mintete mila mewôm ébu a bebaé.

61 Bana be ne ba be nga kôlô Thel-Mélach, Thel-Harscha, Kerub, Addon, a Immer ; ve be nji bo ngule ya lañe menda ya beésa bap, nga mvoñe bôte jap, nge be ne ba ya Israël : 62 Bone be Delaja ; bone be Tobija, abone be Nekoda, bôte mintete misaman mewôm menyin a babaé. 63 A mfa'a ya beprête : bone be Hoboja, bone be Hakkots, bone be Barzillai, nyô a nga lu'u minga be bengone ya Barzillai mone Galaadite, a yôbane fe jôé dap. 64 Balé bete be nga jeñ ntilane wop nsamba ya ba be nga lañebabne na, be te nsem, a be nga vaa be éto beprêtre. 65 Ane njôô a nga jô be na, be bo te di biôm bi adañ étyi, akekui prêtre a ye tebe a bili Urim a Thummim.

66 Ngum nsaba ôse ô mbe tañe bôt betoyini mewôm menyin a babaé mntete mila a mewôm mesaman, 67 te lañe beo bisaé be fam a bebo bisaé be binga, mbe be nga to betoyini zañbwia mintete mila mewôm mela a zañbwia : be nga bili fe befam b'ayia bia a binga b'ayia bia mintete mibaé mewôm menyin a betan. 68 Bikabela biap bi nga to mintete zañbwia mewôme mela a bisaman ; bemulet bap, mintete mibaé mewôm menyin a betan ; 69 bechameau bap, mintete minyin mewôm mela a betan ; a bjikase biap, betpyini besaman mintete zañbwia a mewôm mebaé.

70 Bôte bevo'o mfa'a minlô mi bôte ya menda beésa be nga ve tañ mfa'a ya ésaé. Njôô a nga ve ve mfa'a ya nda be nga naan akum bedarique ya or toyini wua, bisua mewôm metan, a biwomane beprêtre mintete mitan a mewôm mela. 71 Nalé fe minlô mi bôte mivo'o ya menda beésa mi nga ve nda be nga naan akum ya ésaé bedarique ya or betoyini mewôm mebaé, a bemine be argent bebaé a mintete mibaé. 72 Tañe bôte bevo'o be nga ve é mbe bedarique ya or betoyini mewôm mebaé, a bemine be argent betpyini bebaé, a bowomane beprêtre mewôm mesaman a zañbwia.

73 Nalé ate beprêtre, a Belévite, a beba'ale mimbé, a beyia bia, a bôte bevak, a Benéthinien, a Israël ase, be nga tabe minlam miap.

Eyoñ ngone zañbwale é nga kpwaan, bone be Israël be nto minlam miap.

8 1 Ane bôte bese be nga sulane vôme wua aval ane môte wuamfa'a ya beta nseñ a nga to asu mbé mendim ; ane be nga jô Esdras ntili bekakale na, a zu kalate metiñe me Moïse, mme Jehova a nga tiñeti Israël. 2 Ane Esdras prêtre a nga zu metién vôm ésulane bôt é nga to, befam a binga, a ba bese be mbe ngule ya wôk, be tu'a yem, éyoñ ngone zañbwale é nto alu da. 3 Ane a nga lañ été beta nseñ ate, nnye a nga to asumbé mendim ataté ésala tyé akekui zañe mûs, vôm befam a binga be nga to, a ba be mbe ngule ya tu'a wôk ; ane melo me bôte mese me nga vô'ôlô kalate metiñ. 4 Ane Esdras ntili bekalate a nga tebe éto bilé yôp, be nga bo je amu ajô te ; ane Matthithia, a Schéma, a Anaja, a Urié, a Hilkija, a Maaséja, be nga tele nye fefele ya mbo nnôm ; a mfa'a ya mbo nga Pedaja, a Mischaël, a Malkija, a Haschum, a Haschbaddana, Zacharie, a Meschullam. 5 Ane Esdras a nga kui kalate, bôte bese be lô (amu a nga to bôte bese yôp) : nde, éyoñ a nga kui nye, bôte bese be nga tebe betetele. 6 Ane Esdras a nga botane Jehova, beta Zambe ; a bôte bese be nga kañese na, Amen, Amen, be bete'e mo yôp : ane be nga lui minlô miape si, a kañe Jehova, mesu me butu si. 7 Nalé fe Josué, a Bani, a Schérébia, Jamin, Akkub, Schabbethaï, Hodija, Maaséja, Kelitha, Azaria, Jozabad, Hanan, Pelaja, a Belévite, be nga ve bôt ñyemane ya metiñ : ane bôt be nga tebe vôm be nga to. Ane be nga lañe kalate été, kalate metiñ me Zambe, ne sañesañ ! ane be nga fase be benya bafia ya étê, nalé ate be nga tu'a wô'ô nlañan.

9 Ane Néhémie, nnye a mbe njôô, a Esdras ntili bekalate, a Belévite be nga ye'ele bôt, be nga jô bôte bese na, Môse wu ô ne étî be Jehova Zambe wônan ; te wô'an ôlun nge yi. Amu bôte bese be nga yi, éyoñ be nga wô'ô mejô ya metiñ. 10 Eyoñ éte a nga jô be na, Kelan mi ake, mi di biôm bi ne avoñ, a nyu bi bi ne ézezek, a lôme fe nyô ase be nji kôme nye jôm mengap ; amu môse wu ô ne étî be Tate wongan : nalé fe te wô'an ôlun ; amu ava'a Jehova nde e ne

ngule jenan. 11 Nalé Belévite be nga je'e bôte bese, be jô'ô na, Taba'ane bivô, amu môs ô ne étyi ; nalé fe te wô'ane ôlun. 12 Ane bôte bese be nga ke be nga ke, be kele' di a nyu, a lôm mengap, a bo beta mevak ; amu be nga tu'a vô'ôlô mejô be nga kate be.

13 Môse baa minlô mi bôte ya menda beésa ya bôte bese, deprêtre a Belévite be nga sulan vôm Esdras ntili bekalate a nga to, be ve minlem mfa'a ya wô'ô mejô ya metiñ. 14 Ane be nga yen ntilane metién étê, aval ane Jehova a nga tiñeti a Moïse na, bone be Israël b'ayiane tabe bibem éyoñe ya fête ngone zañbwale ; 15 a na, b'ayiane kobô a kate foé minlam map mise, a Jérusalem, na, Kelan mfa'a ya nkô, mi zu mintya beolivier ya fé, a mintya mi myrte, a mebui melen, , a mintya bilé bi ne bizi'ili, mfa'a ya lôñe bibem, aval ane e ne ntilan. 16 Nalé bôt be nga ke, a zu mie, a lôñe bibem mfa'a wop, môt ase andile ya nda jé yôp, a minseñi miap étê, a minseñi ya nda Zambe, a beta nseñ a nga to asu mbé mendim, a beta nseñ ya mbé éphraïm. 17 Ane ngume ésulane ya ba be nga beta so minkôm ô nga lôñ bibem, a tabe bibem étê : amu ataté melu Josué mone Nun akakui môs ôte bone be Israël be nji bo nalé. Ane meva'a me nga dañ bo abui. 18 Nalé fe melu mese, ataté môse ya ôsu akekui môse ya asu'ulan, a nga lañe kalate metiñ me Zambe étê. Ane be nga ba'ale fête éte melu zañbwa ; a môse mwomô ô mbe beta nya ésulane, aval ane njôan ô mbe.

9 Eyoñ ngon éte é nga bo melu mewôm mebaé a menyin, bone be Israël be nga mane sulan, be tyi bidi, a jaé minkuta, a woban étek. 2 Ane mvoñe bôt Israël é nga kandane bone bikule bese, a tebe a mem abé map, a mbia be mam ya beésa bap. 3 Ane be nga tebe tetele vôme wop, a lañe kalate metiñ me Jehova Zambe wop nté étune jia bitune ya môse binyin, a meme fe abé nté étun évo'o' jia, a kañe Jehova Zambe wop. 4 Eyoñ éte Belévite, Josué, a Bani, Kadmiel, Schebania, Bunni, Schéribia, Bani, a Kenani be nga tebe tetele mfa'a ya ôbet, a bete metyiñe yôp ngu a loene Jehova Zambe wop.

5 Eyoñ éte Belévite, Josué, a kadmiel, Bani, Haschabnia, Schrébia, Hodija, Schebania, a Pethachja, be nga jô na, Teba'ane betetele a kañe Jehova zambe wônan ataté nnôm éto akekui nnôm éto ; nalé fe jôé dôé é ne étôtok e bo' ébotan, nde d'abetebane yôp a dañe bibotane bise a nkañan. 6 Wo ô ne Jehova, womien étam ; wo ô nga té yôp, yôpe ya meyôp, a nsamba wop ôse, si a biôm bise bi ne étê, a wo w'aba'ale bie bise ; a nsamba ya yôp w'akañe wo. 7 Wo ô ne Jehova Zambe ate, nyô a na top Abram, a soo nye mfa'a Ur ya Chaldée, a yôlé nye jôé na Abraham, 8 ane ô nga yene nleme wé zôsô asu dôé, a bo nye élate na, w'aye ve nye si ya Becananéen, Behéthien, Beamoréen, Bephérézien, Bejébusien, a Beguirgasien, a ve fe je mvoñe bôte jé, nde ô maneya tôé mejô môé ; amu ô ne zôsô.

9 Ane ô nga yene nju'u ya beésa bangan égypte, a wô'ô fe miñyône miap mfômô Evele Mañ, 10 ane ô nga liti fe Pharaon, a bebo bisaé bé bese, a bôte bese ya si jé, mendem a bitua bi mam ; amu ô nga yeme na, be nga bo be mebun, nalé jôé dôé e nga wum, aval ane môse wu. 11 Ane ô nga kandé mañ asu dap, ajô te be nga lôte mañ zañ mvelan étê ; ane ô nga wua bôt be nga tôñe be bido' étê, aval ane b'awua akok biwôlô mendim étê. 12 Nalé fe na, ô nga liti be zen a nsum nkut a môs ; a nsum nduan alu, mfa'a ya ve be éfufup zen b'aye ke. 13 O nga sise fe si nkôle Sinaï yôp, a kobô be tyiñ é so'o yôp, a ve be bezôsô minjôan a benya miñtiñitane, mbamba memvinda a metiñ, 14 a liti fe sabbat wôé a ne étyi, a tiñeti be metiñ, a memvinda, a ntiñetan, be Moïse mbo ésaé wôé, 15 a ve be bido bi aso yôp mfa'a ya zaé jap, a kuli be mendim m'aso ako' étê mfa'a ya évé jap, a tiñeti be na, b'aye nyiñ a ke nyone si nje ô nga tiñeti na w'aye ve be.

16 Ve balé bete ba beésa bangan be nga bo mebun, a bo ntip, te ke vô'ôlô metiñe môé, 17 a bene bo mewôk, naleyfe be nji simesane bitua bi mam biôé ô nga bo zañe jap, ve bo ntip, a éyoñ be nga to ébiasé nalé, be nga elé évet a kômbô bulan éto belo jap. Ve wo ô ne Zambe a ne nkômane ya jamé, ô ne mvam a éngôngô, ôtete'e ya yaa, a mvam abui, nde ô nji jô'ê be. 18 Ya , éyoñ be nga mane lui mone ényaka a ne nyeman mfa'a wop, a jô na, Zambe wôé nyô a

nga soo wo égypte, a bo fe beta be mame ya soñe wo ; 19 ve a kôsa bo nalé, wo, amu abui mam ya éngôngole dôé, ô nji li'i be fé ét  : nsum nkut ô nji kôl  v m be nga to a m s, a liti be zen ; nge nsum nduan alu, a ve be  fufup, a liti be zen mfa'a b'aye ke. 20 O nga ve fe be mbamba Nsisime w   a ye'ele be, a te ke kame be manne menuy, a ve be mendim mfa'a ya  v e jap. 21 Ya, nt  mimbu mew m menyin ô nga ba'ale be fé ét , be nji je e j m ; meng mesane map me nji ja ntuk, a mebo map me ji bim. 22 Nal  fe na, ô nga ve be mesi a meyo , mme mete ô nga kap aval ane mengape map me mbe : nal  ate be nga bili si ya Sihon, e ne na, si nj  b te ya Hesbon, a si ya og nj  b te ya Basan. 23 Nde ô nga f l  fe bone bap aval ane atet  ya y p, a ke be si, nje ô nga j  be sa bape na, b'aye nyin  t  a nyo  je. 24 Nal  bone bete be nga nyine si  t  a nyo  je, ane ô nga vo b t be nga to si  t , Becanan en asu dap, a ve be mo map  t , ba be bej  b te bap, a meyo  ya si  t , nde te b'aye bo be ane b'anye'e. 25 Ane be nga nyo  minlam mi mbe nl n alem, a si   ne atek, be nyo  fe menda, mbamba be bi m bi to  t  ne lut ! a menje  me to mfa'ane meko'  t , a mefupe mindik, a mefup beolivier, a bil  bibuma abui abui : nal  be nga di, a ja , a bo avem, a yen mva  amu beta mvame w  .

26 A kôsa bo nalé, be nga bo melo, a ben njôane wôé, a wua metiñe môé memvuse map, a wôé bekulu mejô bôé be nga lepe be na, be beta kôñelane be wo, a bo beta be mam ya soñe wo. 27 Ajô te ô nga ve be mo minziziñe miap, mbe be nga kpwe'ele be : éyoñ be nga yene njuk, a tate be wo, ane ô nga wô'ô be yôp étê ; ndeaval ane abui mame ya éngôngole dôé e né ô nga ve be benyii be nga nyii be mo minzizñe miap. 28 Ve éyoñ be nga mane wô'an, be nga beta bo abé mise môé ; ajô te ô nga li'i be mo besiñe map, nalé be nga jôô be : ve éyoñ be nga bulan, a tate be wo, ô nga wô'ô be yôp étê ; ane ô nga nyii be menyii abui amu mame ya éngôngole jôé, 29 a kobô be nkobô ya melep, nde te w'aye beta dutu be be ba'ale metiñe môé. Ve be nga bo minjôane miôé abé (mmie nge môt a bo, a ye veebe étê), ve vit étu, a bo ntip, a bene wôk. 30 Ve ô nga jibi be mimbu abui, a lepe be a nsisime wôé anyu bekulu mejô bôé : ve be nji vô'ôlô : ajô te ô nga ve be mo meyoñe ya mesi. 31 A kôsa bo nalén amu abui mam ya éngôngole dôé, ô nji mane jiane be, nge jô'é be ; amu ô ne Zambe ya mvam a éngôngo.

32 Ajô te éyoñe ji, A Zambe wongan, Zambe a ne anen, a éwôlô, a angôndô, nyô a wô'ô baa'ale élat a bo mvam, te me'été na, nju' ôse ô yené ane tyôtyoé mise môé, ñwô ô kuiya be bia, a be bejôô bôte bangan, a bivet, a beprêtre, a bekulu mejô, a betate, a be bôte bese, ataté melu bejô bôte ya Assyrie azukui môse wu. 33 Ve tame da, ô ne zôsô mfa'a ya mam mese me kuiya be bia ; amu wo ô boyâ nya mboane, ve bia bi bo ya abé ; 34 nalé fe bejô bôte bangan, a bivet, a beprêtre, a betate, be nji ba'ale ntîñetane wôé, nge vô'ôlô metiñê môé a melepe môé, mme ô nga lepe be. 35 Amu be nji tôñe womfa'a ya vôm be nga jôô bôt, nge mfa'a ya mvam ô nga mvamane be, nge mfa'a ya si é ne anen a atek ô nga ve mise map, nge kôñelan mfa'a ya mbia be mimboane miap. 36 Tame yen, bi nto bebo bisaé môse wu, a mfa'a ya si ô nga ve betate bangane na, be di bibuma ya été, a wô'ô mvaé ya été, tame yen, bi nto bebo bisaé été. 37 A si éte j'ave bejô bôt ô nga telé na be jôô bia amu mam abé mangan akum abui : be bili fe ngule ya jôô menyôle mangan, a biyeme biangan, ane b'anye'e, a bi nto beta nju' été. 38 Ve a kôsa bo mam mete mese, bi abo nya élâte, a tili fe nye ; nde bivete biangan, Belévite bangan, a beprêtre bangan, be tame ve ndeme ya yemete je.

10 Ba be nga ve ndeme ya yemete élat, be mbe na : Nehémie njôô, mone Hacalia, a Sédéciás, 2 Seraja, Azaria, Jérémie, 3 Paschhur, Amaria, Malkija, 4 Hattusch, Schebania, Malluc, 5 Harim, Merémoth, Abdias, 6 Daniel, Guinnethon, Baruc, 7 Meschullam, Abija, Mijamin, 8 Maazia, Bilgaï, a Schemaeja ; mbe bete be mbe be prêtre . 9 Belévite be mbe na : Josué mon Azania, Binnuï mfa'a ya bone be Hénadad, Kadmiel ; 10 a bobenyañe bap, Schebania, Hodija, Kelitha, Pelaja, Hanan, 11 Michée, Rehob, Haschabia, 12 Zaccur, Schérébia, Schebania ; 13 Hodija, Bani, a Baninu. 14 Bivete bi bôt bi mbe na : Pareosch, Pachath-Moab, élam, Zatthu, Bani, 15 Bunni, Azgad, Bébaï, Adin, 17 Ather, ézechias, Azzur, 18 Hodija, Haschum, Betsaï, 19 Hariph, Anathoth, Nebaï, 20 Magpiasch, Meschullam, Hézir,

21 Mescházabeel, Tsadok, Joddua, 22 Pelathia, Hanan, Anaja, 23 Hosée, Hanania, Haschub, 24 Halloschesch, Pilcha, Schobek, 25 Rehum, Haschabna, Maaséja, 26 a Achija, Hanan, 27 Malluc, Harim, a Baana.

28 ane bôte bevok, beprêtre, Belévite, beba'ala mimbé, beuia bia, Benéthinien, a ba bese be nga kandane bôte ya mesi a ba'atane metiñe me Zambe, a binga bap, a bo be fam bap, a bengone bap, môt ase a nga bili ñyeman a fek ; 29 mbe bete be nga late bobenzañe bap, benya bôtô bap, a fubu atiñe ya biyo'é a ngana étê na, be wulu metiñe me Zambe étê, mme me nga veban a Moïse mbo ésaé Zambe, nde fe b'aye ba'ale metiñe me Jehova Tate wongan mese, a bo me, a minjôane mié, a memvinda mé ; 30 a na, bi aye bo te ve bôte ya si nyô bengone bangan, nge nyône bengone bap mfa'a ya bo bo be fam bangan ; 31 nalé fe na, nge bôte ya si nyô b'aye zu biôm nge fôn éziñ môse sabbat a kômbô kuan, bi aye bo te kuse jôm be be emôse sabbat, nge môs ô ne étyi ; nalé fe bi aye jô'é mbu zañbwale, a mmiatane ya mvôla ése.

32 Bi nga ve fe biabebien bone metiñe na, mbu ôse bi aye tili biabebien tañe ya ya'an, bitune bi sicle bila, bi aye ve étune jia mfa'a ya ésaé ya nda Zambe wongan ; 33 mfa'a ya fembé ya nlitan, a mfa'a ya mvean avut b 'ave melu mese, a mfa'a ya mvean b'adi'i nduan b'ave melu mese, mfa'a ya besabbat, mfa'a ya meté bengon, mfa'a ya befête be ne mintiñetan, a mfa'a ya biôm bi ne étyi, a mfa'a ya mimvean amu abé mi abo metuna'a ajô Israël, a mfa'a ésaé ése ya nda Zambe wongan. 34 Ane bi nga bo asimba, beprêtre, a Belévite, a bôt mfa'a ya mvean nja'a, a mfa'a ya zu je nda Zambe wongan, aval ane menda beésa bangan me né, biyoñ bbi ne mintiñetan, mimbu mise, mfa'a ya di'i autel ya Jehova Zambe wongane yôp, aval ane e ne ntilane metiñ étê ; 35 a mfa'a ya zu mbômô bibuma ya si jangan, a mbômô bibuma ya mevale bilé mise, mimbu mise, nda Jehova étê ; 36 nalé mintôle ya bo be fam bangan, a mi ya biyeme biangan, aval ane e ne ntilane metiñ, a mintôle mi bon ya mimbam, binyaka a mintômba, mfa'a ya zu bie nda ya Zambe wongan, a ve beprêtre b'abo ésaé nda ya Zambe wongan ; 37 a mfa'a bi ayiane zu mbômô ya mfulane fembé, a mimveane ya mbetane miangan, a bibuma ya mevale bilé mese, a mfefé vin a mbon, a ve beprêtre, mfa'a bitune menda ya nda ya nda Zambe wongan ; nalé fe mfa'a ya ve beprêtre ngape jia ya mengap awôme ya si jangan ; amu mbe, Belévite, b'anyoñe mengape ya ngap awômô minlam mise vôm bi abo mefup. 38 Ane prêtre a ne mon Aaron a ye bo nsamba Belévite éyoñ Belévite b'anyoñe mengape ya ngap awômô : wôna Belévite b'aye zu ngape awômô ya mengap me ya awômô mfa'a ya nda Zambe wongan, a zu je bitune menda étê, mfa'a ya nda b'anaan akum. 39 Amu bone be Israël a bone be Lévi b'aye zu mvean mbetane ya nlisi, a mfefé vin, a mbon, mfa'a ya bitun menda, vôm bisua ya nda Zambe bi né, a bepêtre b'abo ésaé, a beba'ale mimbé, a beyia bia :nalé bi aye bo te li'i nda ya Zambe wongan.

11 Ane bivete bi bôt bi nga tabe Jérusalem : bôte bevo'o bese be nga bo fe asimba na, bôt awôm, b'aye zu môte wua a ye tabe Jérusalem nlam ô ne étyi, a bôt ya mengap mevo' ébu b'aye tabe minlam mife. 2 Ane bôt be nga botane bôte bese be nga ve bebién a nye'ane wop ôse na, b'aye tabe Jérusalem.

3 Bina bi ne bivete ya étune si bi nga tabe Jérusalem : ve mfa'a minlame ya Juda, môt ase a nga tabe ngape si jó minlam miap, e ne na Israël, a beprêtre, a Belévite, a Benéthinien, a bone ya bebo bisaé be Salomon. 4 Bôte bevo'o ya bone be Juda be nga tabe Jérusalem, a bevo'o ya bone be Benjamin. Mfa'a ya bone be Juda : Athaja mon Ozias, mone Zacharie, mon Amaria, mone Schephathia, mone Mahalaleel, mfa'a ya be Pérets ; 5 a Maaséja mone Baruc, mone Col-Hozé, mone Hazaja, mon adaja, mone Jojarib, mone Zacharie, mone Schiloni. 6 Bone be Pérets bese be nga tabe Jérusalem be mbe miñyôyo'o befam mintete minyin mewôm mesaman a mwom.

7 Bana be ne bone be Benjamin : Sallu mone Meschullam, mone Joëd, mone Pedaja, mone Kolaja, mone Maaséja, mn Ithiel, mon ésaïe. 8 Mvuse jó Gabbaï ba Sallaï, bôte mintet ébu mewôm mebaé a mwom. 9 Joël mone Zicri a mbe évete jap ; a Juda mone senua a mbe môta baa ya bejôô nlam.

10 Mfa'a ya beprêtre : Jедаеја mone Jojarib, Jakin, 11 Sereja mone Hilkija, mone Meschullam, mone Tsadok, mone Merajoth, mon Achithub, évete ya nda Zambe, 12 a bobenzañe bap be nga bo be bo' ésaé ya nda, bôte mintete mwom mewôm mebaé a bebaé ; a Adaja mone Jerocham, mone Pelalia, mon Amstsi, mone Zacharie, mone Paschhur, mone Malkija, 13 a bobenzañe bé, be mbe bivete ya menda beésa, bôte mintete mibaé mewôm menyin a bebaé ; a Amaschaï mon Azareel, mon Achzaï, mone Meschillémoth, mon Immer, 14 a bobenzañe bap, biwôlô bi bôt ya ayok, bôt ntete wua mewôm mebaé a mwom. Evete jap é mbe Zabdiel, mone Guedolim.

15 Mfa'a ya Belérite : Schemaeja mone Haschub, mon Azrikam, mone Haschabia, mone Bunni ; 16 a Schebbethaï ba Jozabad, mfa'a bivete ya Belérite, mbe be nga ba'ale bisaé ya atan mfa'a ya nda Zambe ; 17 a Matthania mone Michée, mone Zabdi, mon Asaph, nnye a mbe évete ya taté mvean akéva ya meye'elan, a Bakbukia, môta baa ya bobenzañe bé été ; a Abda mone Schammua, mone Galal, mone Jeduthun. 18 Belérite bese ya nlam ô ne étyi be mbe bôte mintete mibaé mewôm mwom a benyin.

19 Nalé fe beba'ale mimbé, Akkub, Thalmon, a bobenzañe bap, be nga bo be mombô'ô mimbé ya akak, be mbe bôt ntete wua mewôme zañbwa a bebaé. 20 A ba bevo'o' ya israël, mfa'a ya beprêtre, belérite, be nga to minlam mise ya Juda, môt ase ngape si jó. 21 Ve Benéthinen be nga to Ophel : a Tsicha ba Guischepa be nga jó Benéthinen.

22 Evete ya Belérite fe mfa'a ya Jérusalem é mbe Uzzi mone Bani, mone Haschabia, mone Matthania, mone Michée, mfa'a ya bone be asaph, beyia bia, a mfa'a ya jó ésaé ya nda zambe. 23 Amu atiñ e nga so be njô bôt ajô dap, a ngum ngap ô mbe ntyi'an mfaa ya beyia bia, abim e nga yiane môs ôse. 24 A Pethachja mone Meschézabeel, mfa'a ya bone be Zérach mone juda, nnye a nga tele fefel njô bôt mfa'a ya mejô mese ya bôt.

25 Mfa'a ya bone minlam, a mefupe ya été, bôte bevo'o ya bone be Juda be nga to Kirjath-Arba a minlame ya été, a Dibon a minlame ya été, a Jekabtseel a male ya été, 26 a Jéschua, a Molada, a Beth-Paleth, 27 a Hatsar-Schual, a Beer-Schéba a minlame ya été, 28 a Tsiklag, a Mecona a minlam ya été, 29 a En-Rimmon, a Tsoreea, a Jarmuth, 30 Zanoach, Adullam, a male ya été, Lakis a mefupe ya été, a Azéka a minlame ya été. Nalé be nga tabe akôlô Beer-Schéba akekui mbi'il ya Hinnom. 31 Bone be Benjamin be nga tabe fe akôlô Guéba a ke ôsu, mfa'a ya Micmasch, a ajia, a Béthel, a minlame ya été, 32 mfa'a ya Anathot, nob, Hanania, 33 Hatsor, Rama, Guitthaïm, 34 Hadid, Tseboïm, Neballath, 35 Lod, a Ono, mbi'il ya mintyetyeñ. 36 Mfa'a ya Belérite, minsamba mi éziñ ya Juda mi mbe nlatan a Benjamin.

12 Bana be ne beprêtre a Belérite be nga ke nsamba Zorobabel mone Schealthiel, ba Josué : Sereja, Jérémie, Esdras, 2 Amaria, Malluc, Hattusch, 3 Schecania, Rehum, Merémoth, 4 Iddo, Guinnethoï, Abija, 5 Mijamin, Maadia, Bilga, 6 Schemaeja, a Jojarib, Jедаеја, 7 Sallu, Amok, Hilkija, a Jедаеја. Balé bete be mbe bvete ya beprêtre a bobenzañe bap melu me Josué.

8 Nalé Belérite : Josué, Binnui, Kadmiel, Schéribia, Juda, a Matthania, nnye a nga to évete ya mvean akéva, ba be bobenzañe bé. 9 Nalé fe Bakbukia ba Unni, bobenzañe bap, be nga to yat aval ane bito biap bi mbe. 10 Ane Josué a nga biaé Jojakim, a Jojakim a nga biaé éliaschib, a éliaschib a nga biaé Jojada, 11 a Jojada a nga biaé Jonathan, a Jonathan a nga biaé Jaddua.

12 Melu ye Jojakim, beprêtre be nga to, be mbe minlô mi bôte ya menda beésa : mfa'a ya Seraja, Merajia ; mfa'a ya Jérémie, Hanania ; 13 mfa'a ya Esdras, Meschullam ; mfa'a ya Amaria, Jochanan ; 14 mfa'a ya Meluki, Jonathan ; mfa'a ya Schebania, Joseph ; 15 mfa'a ya Harim, Adna ; mfa'a ya Merajoth, Helkaï ; 16 mfa'a ya Iddo, Zacharie ; mfa'a ya Guinnethon, Meschullam ; 17 mfa'a ya Abija, Zicri ; mfa'a ya Minjamin, mfa'a ya Moadia, Pilthaï ; 18 mfa'a

ya Bilga, Schammua ; mfa'a ya Schemaeja, Jonathan ; 19 a mfa'a ya Jедеја, Uzzi ; 20 mfa'a ya Sallaï, Kallaï ; mfa'a ya Amok, éber ; 21 a mfa'a ya Jедеја, Nethaneel.

22 Mfa'a ya Belévite, melu ya éliaschib, Jojada, a a Jochanan a Jaddua, be nga tili minlô mi bôte ya menda beésa ; nalé fe beprêtre, melu Darius mone Perse a nga jôô. 23 Bone be Lévi, minlô mi bôte ya menda beésa, be nga tilibane kalata nkañetane mam, akekui melu me Jochanan mon éliaschib. 24 Nalé fe bivete ya Belévite : Haschabia, Schérébia, a Josué mone Kadmiel, ba be bobenyañe bap be to be yat, mfa'a ya yia bia a ve akéva, aval ane atiñe David môt ya Zambe e nga to, bemombô be ty'a be bemombô bevok. 25 Ane Matthania, Bakbukia, Abdias, Meschullam, Thalmon, a akkub be mbe beba'ale mimbé, be mombô'ô menda ya mimbé mi akak vôm be nga bo be na'ane biôm. 26 Balé bete be nga to melu me ya Jojakim mone Josué, mone Jotsadak, a melu me ya Nehémie njôô, a ma ya Esdras prêtre a ntili bekalate.

27 Eyoñe ya ésulan be nga ve Zambe aka'a ya Jérusalem ngum mvean, ane be nga jeñé Belévite vôm ase be nga to, a kômbô zu be Jérusalem, mfa'a ya ba'ale ésulane ya mvean éte a mevak, a mvean akéva, a ñyiane bia, a mbômane biwoé, a memvet, a bingombé. 28 Ane bone ya beyia bia be nga sulane vôme wua, be so'o nje'ese w'abômane Jérusalem, be so'o fe male ya B ; Benethophathien ; 29 be so'o fe Beth-Guigal, a mefupe ya Guéba a Azmaveth : amu beyia bia be nga mane lôñe male map mbôma'ane Jérusalem. 30 Ane beprêtre ba be Belévite be nga tune bebiens ; be nga tune fe bôt, a mimbé mi akak, a akak.

31 Eyoñ éte me nga bete bivete ya Juda aka'a yôp, a telé beta minsamba mibaé mi nga ve akéva wulu nnoñe wua ; minsamba mite wua ô nga ke mfa'a ya mbo nnôm be wulu aka'a yôp a ke mfa'a ya mbé mebi : 32 ane Hosée ba be éfase bivete ya Juda be nga tôñe be, 33 a Azaria, Esdras, a Meschullam, 34 Juda, a Benjamin, a Schemaeja, a Jérémie, 35 ba be bone bevo'o ya beprêtre, be bili metoñ : Zacharia mone Jonathan, mone Schemaeja, mone Matthania, mone Michée, mone Zaccur, mon Asaph ; 36 ba be bobenyañe bé, Schemaéja, a Azaréel, Milalî, Guilalaï, Maaï, Nethaneel, a Juda, a Hanani, be bili biôme ya bôm bi ya David môte ya Zambe ; a Esdras ntili bekalate a to be ôsu. 37 Ane be nga lôt mbé ya anjeñ, a ke zôsô ôsu, a bet ôbete ya nlame David, vôm aka'a d'abet , nda David yôp, akekui mbé mendim mfa'a jôp d'atôô.

38 Ane nsamba mbo'o ya ba be nga ve akéva ô nga kôlô si a ke tôbane be, ma me ty'a be mvus, a éfase bôt, bi wulu aka'a yôp, bi tindi nda b'amombô aka'a yôp, nyô ya mimbe'e mi nduan, si, akekui vôm aka' e ne ndam, 39 bi lôte fe mbé éphraïm yôp, a lôt nnôm mbé, a mbé kos, a nda ya be Hananeel b'amombô aka'a yôp, a nda ya be Mea b'amombô aka'a yôp, akekui mbé mintômba : ane be nga tebe ne sim mfa'a mbé aka'a nsamba bezimbi w'aba'ale njô bôt. 40 Nalé ate minsamba mite mibaé ya ba be nga ve akéva nda Zambe été mi nga tebe, a ma, a éfase bejôô nsamba wom ; 41 a fulane fe beprêtre, éliakim, Maaséja, Mijamin, Michée, Eljoénaï, Zacharie, a Hanania, be bili metoñ ; 42 nalé fe Maaséja, a Schamaeja, a éléazar, a Uzzi, a Jochanan, a Malkija, a élam, a ézer. Ane beyia bia be nga yia tyiñe yôp, Jizrachja a to évete jap. 43 Ane be nga tyi'i abui biôm mûs ôte, a vak ; amu Zambe a nga tindi be be va'a beta mva'an ; binga a bongô fe be nga vak : ajô te be nga wô'ô meva'a ya Jérusalem ôyap.

44 Môs ôte bôt be nga teléban mfa'a ya ba'ale bitune menda ya naan akum, a mfa'a ya mimveane ya mbetan, a bembômô bibuma, a mengape ya awômô, be kô'ane bie, aval ane mefupe ya minlam mi né, bi bo mengap metiñ me nga tiñeti mfa'a ya beprêtre a Belévite : amu Juda a nga vak ajô beprêtre a Belévite be nga bo be tebe'e. 45 Ane be nga ba'ale atiñe ya Zambe wop, a atiñe ya ntunan, a beyia bia a beba'ale mimbé be nga bo fe nalé, aval ane atiñe David e nga to, a di ya Salomon mone wé. 46 Amu melu kôa éyoñ David be Asaph be nga to, be nga bili évete beyia bia, abia ya nkañan a mveane Zambe akéva. 47 Nde melu me Zorobabel, a melu me Nehémie, Israël ase a nga bo a va'a mengape ya beyia bia a beba'ale mimbé, abim e nga yiane mûs ôse : be nga bo fe be kandé'é ngape ya Belévite ; a Belévite be nga kandé fe ngape ya bone be Aaron.

13 Môs ôte, ane be nga lañe kalata Moïse me bôt été ; a vôm ate be nga koé ntilane na, mon Ammonite nge Mone Moabite a ye bo te nyin ésulane bôte ya Zambe été nnôm éto, 2 amu be nji tôbane bone be Israël a ve be bidi a mendim, ve viane kuse Balaam a tebe be ngame yat, a yo'é be : ve jame da, Zambe wongan a nga kôñelane biyo'é bite ébotan. 3 Nde a nga bo na, éyoñ be nga mane wô'ô atiñ ete, ane be nga vaa jama bôt ase mevale meva Israël été.

4 Jam ete e ngenan te boban, éliaschib prêtre, nyô a nga telébane na, a ba'ale bitune bi nda ya Zambe wongan, amu ba Tobija be nga to nlatan, 5 a nga mane kôme nye beta étun nda, vôm be nga bo be bôé' mimveane ya avut melu mvus, a encens, a bisua, a mengap awômô ya fôn, a mfefé vin, a mbon, mbie bi nga bo bi veba'ane Belérite amu atiñ, nalé fe beyia bia, a beba'ale mimbé ; a fulane fe mimveane ya mbetan mfa'a ya beprêtre. 6 Ve melu mete mese me nji bo Jérusalem ; amu mbu mewôm mela a baa Artaxerxès njô nôte ya Babylone a nga jôô, ñwô me nga ke be njô bôt : nde éyoñ melu me éziñ me nga lôt, me nga ja'é njô bôt a suu ma, 7 ane me nga zu Jérusalem, a yemelan abé éliaschib a nga bo ajô tobija, vôm a nga kôm nye étun nda minseñé ya nda Zambe été. 8 Jam ete e nga dañe ve me ôlun nlem : ajô te me nga wua biôm bi Tobija bise atan, a vaa bie étun nda été. 9 Eyoñ éte me nga ve atiñ, ane be nga tune bitune menda bite : ane me nga beta futi bisua ya nda Zambe wôé, a fulane fe mimveane ya avut a encens.

10 Ane me nga yene na, be nji ve belérite mangape map ; ajô te Belérite a beyia bia, ba be nga bo be bo' ésaé , be nga mane tup, môt ase, mfa'a ya afupe dé. 11 Eyoñ éte me nga sôane bejôô, a jô na, nda zambe é li'iya zesé amu jé ? Ane me nga beta sulane be, a telé be bito biap. 12 Eyoñ éte Juda ase a nga zu ve ngape awômô ya fôn, a mfefé vin, a mbon, mfa'a ya menda b'anaane biôm. 13 Ane me nga telé beba'ale akume ya ba'ale menda b'anaane biôm, Schéléria prêtre, a Tsadok ntili bekalate, a Padaja, môte ya Belérite : a môt a nga toé be valé a mbe Hanan mone Zaccur, mone Matthania ; amu be nga yene be zôsô, a ésaé jap é mbe na, be bo be kabe'e bobenyañé bape biôm. 14 A Zambe wom, ô simesa'ane me ajô di, a te tyam mbamba be mam me boy a mfa'a nda ya Zambe wom, a mfa'a ya ba'ale bisaé ya été.

15 Melu mete me nga yen mfa'a ya Juda ane bôte bevo'o be nga miate bibuma mindik môse sabbat, a zu mimbom bidi, a beté mie bijakase yôp ; nalé fe vin, a bibuma mindik, a befigue, a mimbe'e mevale meva, mbie be nga bo be za'a bie Jérusalem môse sabbat : ane me nga bame be môs eya ya be nga kuane bidi bite. 16 Bôte ya Tyr be nga to fe été, mbe be nga zu kos, a akume mevale meva, a kuane bone be Juda môse sabbat, a mfa'a ya Jérusalem. 17 Eyoñ éte me nga sôane benya bôtô ya Juda, a jô be na, Za aka'a mbia jam mi abo di, a ndaman étyi ya mose Sabbath ? 18 Ye beéso benan be nji bo ana, nalé fe ye Zambe wongana nji zu abé te se be bia, a nlame wu ? ve mia mi aviane dutu Israël ayaa afe amu mi andaman étyi ya môse sabbat.

19 A nga bo na, éyoñ mimbé mi aka'a ya Jérusalem mi nga taté bo dibi éyoñ môse sabbat ô nga ye bo, ane me nga ve atiñe na, mimbé mi ayiane diban, a tiñeti fe na, be bo te beta dii mie ve akekui môse sabbat ô lôteya : me nga telé fe bebo bisaé bam bevolk be ba'ale mimbé mite, ane mbe'e w'aye bo te lôt été môse sabbat. 20 Nalé ate bekuan abom a bekuane mevale me biôme mese be nga bômbô Jérusalem atan éyoñ jia nge bibaé. 21 Eyoñ éte me nga bame be, a jô be na, Mi abômbô mfôm akak amu jé ? nge mi aye beta bo nalé, m'aye ke mia mo nyô. Ataté éyoñ éte be nji fe beta zu môse sabbat. 22 Ane me nga tiñeti Belérite na, b'ayiane tune bebién, nalé fe b'ayiane zu ba'ale mimbé mi akak, mfa'a ya telé môse sabbat étyi. A Zambe wom, ô simesa'ane fe jame di, a ko me éngôngô aval ane beta mvame wôé a né.

23 Melu mete me nga yene fe na, Bejuif be maneya lu'u binga ya Asdod, a ba ya Ammon, a Moab : 24 nde bone bap be nga kobô étun étun a nkobô ya Asdod, te ngule ye kobô nkobô ya Bejuif, ve aval ane nkobô ya ayoñ ese e né. 25 Ane me nga sôane be, a yo'é be, a bibi be bevolk, a té fe be ési, a tindi be be kan ngana be Zambe, a jô na, Mi aye

bo te ve bo be fam bap bengone benan, nge nyōne bengone bap mfa'a ya bo be fam benan, nge mfa'a wônan miabebien. 26 Ke Salomon njô bôte ya Israël a nga bo abé amu mam mete ? ve njô bôt a nji funane nye meyoñ abui étê, ane Zambe wé a nga nye'e nye, a Zambe a nga telé nye njô bôte ya Israël ase : a kôsa bo nalé, to nnye, binga biku be nga dutu nye a bo abé. 27 Ye bi aye tame vô'ôlô mia mi bo beta abé nyô, a kop be Zambe wongan vôm mi alu'u bengone biku ?

28 Ane môte wua ya bone be Jojada, mon éliaschib njô beprêtre, a mbe nnomengone Sanballat mone Hoonite : ajô te me nga titane nye vôm me nga to. 29 A Zambe wom, ô simesa'ane be, amu be maneya sem éto ya beprêtre, a élâte ya beprêtre, a ji ya Belévite.

30 Nalé ate me nga tune be mfa'a ya bukule bise, a telé beprêtre a Belévite mam ya bo, môt ase ésaé jé ; 31 a mfa'a ya mveane ya nja'a, a biyoñ bi ne mintiñetan, a bembômô bibuma. A Zambe wom, ô simesa'ane ma mfa'a ya bo me mvaé.



Rev. Matthias MEYE
Secrétaire Général 1961....